

сотворити брань. Услыша великий князь Юрьи Игоревичъ Резанский, что несть ему помощи от великаго князя Еоргия Всеволодовича, и вскоре посла по братию свою — по князя Давыда, да по князя Глеба Игоревичев Муромских, да по князя Ольга Къраснаго, и по Всеволода Пронскаго, и по протчия князи. Начаша совещатися, яко нечестиваго подобает дары утолити. И посла сына своего князя Федора^а Юрьевича Резанскаго к безбожному царю Батыю з дары великими, чтобы не воевал Резанския земли. Князь Феодор Юрьевичъ прииде на реку Воронежъ к царю Батыю, и принесе ему дары великия, и моля царя Батыя, чтобы не воевал Резанския земли. И безбожный и нечестивый царь Батый, прия дары великия, и охачися леностию, что не воевать Резанския земли, а яряся воевать Руския земли. И нача просити резанских князей тыщери или сестры себе на ложу. И некий от вельможъ резанских завистию дьяволевою вложи безбожному царю Батыю на князя Федора Юрьевича, яко имея у себя княгиню царьскаго роду, а лепотою и телом красна зело. И лукавый царь Батый поревнова с похотию плоти своея, и рече князю Феодору Юрьевичю: „Дай мне, княже, видети жены твоя красоту“. Благоверный жь князь Феодор Юрьевичъ посмеявся, и рече царю: „Не полезно бо есть нам крестияном тебе нечестивому царю водить жены своя на блуд. Аще нами преодолеши, то и женами наши владети начнеши“. И безбожный же царь Батый возярился и огорчился, и повеле^б въскоре убити благовернаго князя Федора Юрьевича, а тело его повеле повреци зверем и птицамъ на разтаргнание; и иных нарочитых князей и все войско велел побити, которые с ним пришли.

Един от пестун князя Федора Юрьевича украся и зря на блаженное тело своего государя, горько плачущи, и видя его никим не брегома, и взя любезнаго своего государя тайно, и сохрани его. И ускори ко благоверной княгине Еупраксее сказати, яко нечестивый уби блаженнаго князя Федора Юрьевича.

И благоверная княгиня Еупраксея шед в превысоком храме своем и держа^в любезное свое чадо князя Ивана Феодоровича и услыша таковыя смертоносныя глаголы, и горести наполнися, и абие ринувся ис превысокаго храма и с сыном своим со князем Иваном Феодоровичем на среду земли, и заразися до смерти. И услыша великий князь Юрьи Игоревичъ убиение возлюбленнаго сына своего благовернаго князя Федора Юрьевича, и иных нарочитых князей, и многих людей побитых от безбожнаго царя Батыя, и нача плакати, и с великою княгинею, и прочимы княгинями, и со братиею. И плакася весь град на долг час. И едва отдохнув от великаго плача, и нача совокуплятися, и войско свое учредиша. Князь великий Юрьи Игоревичъ виде братью свою, и боляр, и воевод своих храбро мужественных ноездя, воздеваше руце

^а В рук. написано позднее о: Федора.

^б В рук.: поволе.

^в В рук.: доржа